

आकाशवाणी रायपुर (छत्तीसगढ़)
प्रादेशिक समाचार बुलेटिन
(छत्तीसगढ़ी)

दिनांक 04.06.2024

18.10 मंगलवार

प्रमुख समाचार –

- लोकसभा चुनाव बर होवत हे मतगणना देस म एनडीए गठबंधन करीबन दू सौ नब्बे ले जादा सीट म आगू – उन्हें, इंडिया गठबंधन के उम्मीदवार करीबन दू सौ पैंतीस सीट म चलत हे आगू।
- छत्तीसगढ़ के ग्यारह सीट ले दस सीट म भारतीय जनता पार्टी हे आगू– उन्हें, कोरबा लोकसभा सीट म कांग्रेस उम्मीदवार बनाय राखे हे बढ़त।
- छत्तीसगढ़ म मानसून अवइया दू–तीन दिन म दे सकत हे दस्तक– जगदलपुर म आज संझा गरज–चमक संग होइस जोरदरहा बरसा।

.....

मतगणना राष्ट्रीय

अट्ठारहवीं लोकसभा के चुनाव बर वोट के गनती चलत हे। लोकसभा के सबो पांच सौ तिरालिस म रूझान अब परिणाम म बदलत जात हे, कतकोन जघा के नतीजा घोसित होंगे हे। एनडीए गठबंधन ह करीबन दू सौ नब्बे सीट म उन्हें, इंडिया गठबंधन दू सौ पैंतीस सीट म आगू हे। अन्य दल अट्ठारा सीट म आगू चलत हे। भारतीय जनता पार्टी दू सौ अड़तीस सीट म उन्हें, कांग्रेस निन्यान्वे सीट म बढ़त बनाय हे। आने–आने राज्य के बात करन त, उत्तर प्रदेश म अस्सी सीट म इंडिया गठबंधन इकचालिस अउ एनडीए अड़तीस सीट म बढ़त बनाय हे। मध्यप्रदेश म भारतीय जनता पार्टी सबो उनतीस सीट म आगू चलत हे।

गुजरात के छब्बीस सीट म ले भारतीय जनता पार्टी पच्चीस म अउ इंडिया गठबंधन एक म आगू हवय। बिहार के चालीस सीट म एनडीए इकतीस अउ इंडिया गठबंधन आठ सीट म आगू हे। महाराष्ट्र के

अड़तालिस सीट म एनडीए उन्नीस अउ इंडिया गठबंधन अट्ठाइस म आगू चलत हे। राजस्थान के पच्चीस सीट म भारतीय जनता पार्टी चौदा अउ इंडिया गठबंधन ग्यारह म आगू हे। आगू चलत प्रमुख उम्मीदवार म प्रधानमंत्री अउ वाराणसी ले भारतीय जनता पार्टी के उम्मीदवार नरेंद्र मोदी ह एक लाख बावन हजार ले जादा वोट ले चुनाव जीत गेहे। उन्हें, गांधी नगर ले केंद्रीय मंत्री अमित शाह ह सात लाख चौवालिस हजार ले जादा वोट ले जीत हासिल करे हे। आगू चलत प्रमुख उम्मीदवार म गुना ले ज्योतिरादित्य सिंधिया अउ मुंबई नार्थ ले पीयूष गोयल के नाव हे।

मतगणना—छत्तीसगढ़

जिहां तक छत्तीसगढ़ के बात करन त, राज्य के ग्यारह सीट म ले दस म भारतीय जनता पार्टी के उम्मीदवार आगू हे। उन्हें, कोरबा सीट म कांग्रेस उम्मीदवार बढ़त बनाय हे। राज्य के ए सबो ग्यारह लोकसभा सीट के संबंध म बिस्तार ले ब्योरा देवत हे, न्यूज डेस्क ले राहूल सिन्हा

होल्ड साउंड

अब हम सोज्झे बात करथन हमर दुरुग संवाददाता अभय जवादे ले। त अभय मतगणना के संबंध म जानकारी देवव।

आवव अब बात करबो महासमुंद म हमर संवाददाता आनंदराम साहू तीर। आनंद महासमुंद म मतगणना के का स्थिति हे बतावव।

अउ अब चलथन जांजगीर लोकसभा सीट जिहां हमर संवाददाता राजकुमार साहू मतगणना केन्द्र म हवय। राजकुमार बतावव काहे ताजा स्थिति।

अब पारी हे राजनांदगांव लोकसभा सीट के राजनांदगांव म हमर संवाददाता मिथिलेश देवांगन मौजूद हे त, मिथिलेश का हे ताजा स्थिति बतावव ।

मौसम

छत्तीसगढ़ म मानसून अवइया दू-तीन दिन म दस्तक दे सकत हे । इही बीच, बस्तर के संभागीय मुख्यालय जगदलपुर म आज संझा मौसम बदल गे अउ मंझनिया बाद इहा गरज-चमक संग जोरदरहा बरसा होइस ।

